

Tuesday, May 6, 2025

Time - 2:30pm

HSSLC RESULT

Higher Secondary School Leaving Certificate (HSSLC) examination result vawiina Mizoram Board of School Education-in a tihchhuahah exam zawng zawng zing zaa 81.10 an pass a, nikuma pass aiin za zela 3.06-in an tam.

Vawiina HSSLC Exam result tihchhuah ah hian Science Stream atangin Cynthia Lalhlupuii Shangpiliang St Pauls Hr Sec School chuan mark 500 ah mark 477 hmuin pakhatna a ni a, Cynthia Lalhlupuii Shangpiliang hi kum 2023 khan HSLC Exam ah pakhatna alo ni tawh a ni.

Arts stream atangin Lalrammawii Tochohong, Mt. Carmel School chuan mark 500 ah mark 471 hmuin pakhatna a ni a, Lalrammawii hian a beisei aia a tih that thu sawiin an zirtirtute chungah lawmthu a sawi a ni.

HSSLC Exam result vawiina tihchhuah ah hian Commerce Stream atangin Kristin Laldinpuii Ralte, Oikos Hr Sec School chuan mark 500 ah mark 470 hmuin pakhatna a ni baw.

Kuminah hian exam beitu zirlai 12,105 an awm a, Arts-ah tam berin zirlai 8,658 , Science-ah zirlai 2,798, leh Commerce-ah zirlai 649 ten exam hi an hmachhawn a, A pumpuih exam hmachhawn zat mipa aiin hmeichhia 1015-in an tam zawk a, Pass zat pawh hmeichhia 1035-in an tam zawk a ni.

HSSLC pass thar te hi Distinction-a pass mi 701, nikum aiin 62-in an tam a, I Division-a pass mi 3250, nikum aiin 117-in an tlem a, II Division-a pass mi 3970, nikum aiin 445-in an tam a, III Division-a pass mi 1896, nikum aiin 200-in an tam a ni.

Zirlai zawng zawngte pass vekthei hi Arts-ah school 46, Science-ah school 9 leh Commerce-ah school 2 an awm a. Candidate zawng zawng fail vekna Arts leh Commerce-ah school 2 an awm a, Science-ah an awm lo thung a ni.



MBSE CHAIRMAN

MBSE Chairman Pu JH Zoremthanga'n kumin HSSLC exama compartment zirlai 91 ten Admission an tlai lohna turin compartment exam buatsaih thuai an tum thu a sawi.

HSSLC result tihchhuah a nih velah MBSE Chairman JH Zoremthanga chuan a pisaah thuthar thehdarhtute kawmin Kumina zirlai compartment 91 ten admission an tlai lohna turin compartment exam buatsaih thuai an tum avangin HSSLC result complaint hun chu result chhuah atanga ni 7 a ni a ti a, Exam zawhnate chu LOTS atangin 50-60% siam a ni a, abak 40-50% chu Application leh HOTS atanga siam a ni tih sawiin Zirna in hma a sawn zel theih nan HOTS question telh tam tura ruahman a ni a ti a, NEP 2020 zulzuiin subject pakhatna chauh exam that ti duh tan a kum leh ngah ngai lovin Compartmental exam rualin kuminah an exam nghal theih tih a sawi baw.

MBSE chairman chuan HSSLC exam tluang taka an zo thei leh ruahman lawk anga result an chhuah theihna chhan bulpui ber chu thawktute tanrualna ani a ti a, HSSLC pass zawng zawngte an lawmpui thu sawiin, a hlawhtling ve lote pawh beidawng mai lo turin a chah baw.



LSA PROTEST

Lai Autonomous District Council Sorkar thiata, inthlan buatsaih ngiatin vawiin khan Lai Students' Association huaihawtin LADC pisa leh DC pisa kai tur te dan an ni.

Lawngtlai Students' Association chuan May 2 kha thuchhuah siamin Mizoram Larsap Gen (Rtd) Vijay Kumar Singh hnenah LADC thiata inthlanna buatsaih a nih theih nana hma la turin an ngen a, hemi hmalam pawh hian Governor hnenah ngenna an lo thlen tawh a, an thuchhuahah an ngenna chu Ni 4 chhung a tih hlawhtlin a nih loh chuan Sorkar Pisa te dan an tum thu tarlangin vawiin atang khan LADC Office leh DC Office a kaiturte an dang tan a ni.

Lai Students Association General Secretary Matthew Lalhumliana Fanchun chuan an duh ber chu LADC-a inthlan that ani an ti a, tunhnaia CEM inthlak zing lutuk chu mipuite zahlohna lian tak ani tih sawiin an ngenna chu sawrkarin hriatpui se, inthlan that chu buatsaih se an duh thu a sawi bawk.

Lawngtlai Students' Association chuan LADC ah tun Sorkar Term kal lai ah Sorkar inthlak a thlen nasat vangin eng Party mah rorelna chang tura rin ngam an neih loh vangin Sorkar dinglai thiata, inthlanna buatsaih thuai chu an duh ber a nih thu an sawi a, an kal zel dan tur chu Committee in a ngaihtuah zel tur thu leh chanchin buatsaih lai thlengin Governor atangin eng thu mah an dawnloh thu Zirlai pawl hruaitu chuan a sawi bawk.



ART & CULTURE MINISTER

Tribal Research Institute, Art & Culture Department bul tumin vawiin khan Department of History, Govt.’ Aizawl West College leh Department of History, Pachhunga University College tangkawp buatsaih ni hnih chhung awh tur Mizo ei leh in chungchang zirchianna - ‘International Seminar On Mizo Foodways: Cultural Traditions, Societal Transformations, and Political Dimensions Across Time chu Government Aizawl West College-ah neih tan a ni.

He huna khuallian Art & Culture Minister Pu C. Lalsawivunga, chuan Zohnahthlakte chu tlang hrang hrangah awm mahse, inkungkaih leh inphiarzawm tlat - Close-knit Society ni tura siam annih avangin hnam ziarang nghet taka phuarkhawmtu Mizo hnam an nihna humhim tlat a pawimawh thu a sawi a, vawiin thlengin chhungkua, thenawm khawveng leh khawtlangah Mizo nun zemawi chawinun zel tha a tih thu sawiin khawtlang leh hnam tipumkhat tu leh tichak tu a ni reng dawn tih a sawi.

Minister chuan seminar kaltlanga Mizo food culture zirchianna chuan hriatzauna kawngah rah tha tak a chhuah ngei a beisei tih tarlangin, sawrkar pawhin Mizo tobul leh culture chhui a, zirchiang turin Research Committee a din tih a sawi bawk.

